



სსიპ გარემოს ეროვნული სააგენტო

31 დეკემბერი 2025



N 831/ს

ბ რ ძ ა ნ ე ბ ა

ბოლნისის მუნიციპალიტეტში, დაბა კაზრეთში, სს „არ ემ ჯი კოპერის“ მიერ გარემოსთვის მიყენებული მნიშვნელოვანი ზიანის (მდ. მაშავერას და მდ. კაზრეთულას დაბინძურება) გამოსასწორებელი ღონისძიებების გეგმის შეთანხმების შესახებ

სს „არ ემ ჯი კოპერი“ (ს/კ: 225358341) ახორციელებს „გარემოსდაცვითი პასუხისმგებლობის შესახებ“ საქართველოს კანონის (შემდგომ - კანონი) მე-2 დანართის (გარემოსთვის განსაკუთრებით საშიში საქმიანობები) პირველი პუნქტით გათვალისწინებულ საქმიანობას (საქართველოს გარემოს დაცვისა და სოფლის მეურნეობის მინისტრის 2019 წლის 08 ივლისის №2-626 ბრძანებით გაცემულია გარემოსდაცვითი გადაწყვეტილება).

საქართველოს გარემოს დაცვისა და სოფლის მეურნეობის სამინისტროს სახელმწიფო საქვეუწყებო დაწესებულება - გარემოსდაცვითი ზედამხედველობის დეპარტამენტის (შემდგომ - სსდ - გარემოსდაცვითი ზედამხედველობის დეპარტამენტი) უფროსის 2023 წლის 17 მარტის №DES72300000066 ბრძანებით (შემდგომ - №DES72300000066 ბრძანება), გარემოსთვის მნიშვნელოვანი ზიანის მიყენებისთვის, სს „არ ემ ჯი კოპერს“, კანონის მე-6 მუხლის მე-7 პუნქტის და 28-ე მუხლის მე-3 პუნქტის საფუძველზე, დაეკისრა მკაცრი გარემოსდაცვითი პასუხისმგებლობა.

სსდ - გარემოსდაცვითი ზედამხედველობის დეპარტამენტის უფროსის 2023 წლის 17 მარტის №DES72300000066 ბრძანების მიხედვით, სს „არ ემ ჯი კოპერის“ უკანონო ქმედებამ გამოიწვია ბოლნისის მუნიციპალიტეტის დაბა კაზრეთში, მდ. კაზრეთულასა და მდ. მაშავერაში ჩაშვებულ ჩამდინარე წყალში დამაბინძურებელ ნივთიერებათა რაოდენობის დადგენილ ნორმებზე 10-ჯერ და მეტად გადაჭარბება. კერძოდ, ჩაშვებულ ჩამდინარე წყალში, დადგენილ ნორმებს აღემატებოდა შემდეგი დამაბინძურებელი ნივთიერებები: სულფატები (SO_4) - 13.36 - ჯერ; რკინა (Fe) - 28.25-ჯერ; სპილენძი (Cu) - 536.76 - ჯერ და თუთია (Zn) - 915.48 - ჯერ.

ამასთან, ზედაპირული წყლის ობიექტებზე ზემოაღნიშნული მავნე ზემოქმედების შედეგად, გაუარესდა წყლის ფიზიკური, ქიმიური და ბიოლოგიური თვისებები, რამაც გამოიწვია მდ. კაზრეთულასა და მდ. მაშავერაში თევზის რესურსის განადგურება.

ზემოაღნიშნული ზიანი, კანონის №1 დანართის მე-3 პუნქტის „ბ“ და „გ“ ქვეპუნქტების მიხედვით, წარმოადგენს გარემოსთვის მიყენებულ მნიშვნელოვან ზიანს და შესაბამისად იწვევს გარემოსდაცვით პასუხისმგებლობას.

სს „არ ემ ჯი კოპერის“ მიერ, კანონის მე-8 მუხლის მე-5 და მე-7 პუნქტების მოთხოვნის შესაბამისად, 2023 წლის 22 მაისს სააგენტოში წარმოდგენილი იქნა ინფორმაცია, №DES72300000066 ბრძანებით დადგენილი დაზიანებული გარემოს - მდ. კაზრეთულას პირვანდელ (ზიანის მიყენებამდე არსებულ) მდგომარეობასთან მიახლოებულ მდგომარეობამდე აღდგენის და მდ. მაშავერას პირვანდელ (ზიანის მიყენებამდე არსებულ) მდგომარეობაში აღდგენის შესაძლებლობის შესახებ.

ზემოაღნიშნულ საკითხთან დაკავშირებით, სააგენტოში მიმდინარე ადმინისტრაციული საქმისწარმოების პროცესში, სს „არ ემ ჯი კოპერის“ მიერ წარმოდგენილი ინფორმაციის განხილვის შედეგად დადგინდა, რომ №DES72300000066 ბრძანებით განსაზღვრული დაზიანებული გარემოს - მდ. კაზრეთულას პირვანდელ (ზიანის მიყენებამდე არსებულ)

მდგომარეობასთან მიახლოებულ მდგომარეობამდე აღდგენა და მდ. მაშავერას პირვანდელ (ზიანის მიყენებამდე არსებულ) მდგომარეობაში აღდგენა შესაძლებელია. შესაბამისად, სააგენტოს უფროსის 2023 წლის 4 ივლისის №316/ს ბრძანებით გამოცა გადაწვეტილება „ბოლნისის მუნიციპალიტეტში, დაბა კაზრეთში, სს „RMG Copper“-ის მიერ დაზიანებული გარემოს პირვანდელ (ზიანის მიყენებამდე არსებულ) მდგომარეობაში აღდგენისა და პირვანდელ (ზიანის მიყენებამდე არსებულ) მდგომარეობასთან მიახლოებულ მდგომარეობამდე აღდგენის შესაძლებლობის შესახებ“.

სააგენტოს უფროსის №316/ს ბრძანების მე-3 პუნქტისა და კანონის მე-8 მუხლის მე-5 პუნქტის „ბ“ ქვეპუნქტის შესაბამისად, სს „არ ემ ჯი კოპერმა“ 2023 წლის 7 ნოემბრის № 125.533 წერილით სააგენტოში შესათანხმებლად წარმოადგინა ბოლნისის მუნიციპალიტეტში, გარემოსთვის მიყენებული მნიშვნელოვანი ზიანის (ზედაპირული წყლის ობიექტები: მდ. კაზრეთულა და მდ. მაშავერა) გამოსასწორებელი ღონისძიებების გეგმა (შემდგომ - გეგმა). აღნიშნული გეგმა მომზადებულია სს „არ ემ ჯი კოპერის“ მიერ.

წარმოდგენილი გეგმა ითვალისწინებს სხვადასხვა ღონისძიებების განხორციელებას, რომლის მიზანია მდინარეების დაბინძურების წყაროების სრული აღკვეთა გამწმენდი ნაგებობის მოწყობით, ხოლო მდ. მაშავერას თევზის რესურსის რაოდენობრივი და ხარისხობრივი მდგომარეობის შენარჩუნება და გაუმჯობესება დათევზიანების საშუალებით.

ზემოაღნიშნული გეგმის განხილვის მიზნით, კანონის მე-11 მუხლის საფუძველზე, სააგენტოს უფროსის 2023 წლის 29 დეკემბრის №753/ს ბრძანებით, შეიქმნა გეგმის განმხილველი კომისია, რომელშიც ჩართულები იყვნენ, როგორც საზოგადოებრივი ექსპერტები, ასევე სააგენტოს და სამინისტროს წარმომადგენლები.

გეგმის განხილვის ადმინისტრაციული წარმოების ეტაპზე, გარემოსთვის მნიშვნელოვანი ზიანის მიყენებისას ზიანის გამოსასწორებელი ღონისძიებების განსაზღვრაში დაინტერესებული პირ(ებ)ის მონაწილეობის უზრუნველსაყოფად, სააგენტომ, კანონის მე-10 მუხლის შესაბამისად, ასევე უზრუნველყო ინფორმაციის განთავსება სააგენტოს ოფიციალურ ვებ-გვერდზე და გარემოსდაცვით საინფორმაციო პორტალზე. ადმინისტრაციული წარმოების ეტაპზე, აღნიშნულ გეგმასთან დაკავშირებით, დაინტერესებული პირ(ებ)ის მიერ შენიშვნები/მოსაზრებები სააგენტოში არ წარმოდგენილა.

გარემოსთვის მიყენებული მნიშვნელოვანი ზიანის გამოსასწორებელი ღონისძიებების გეგმის განხილვის ადმინისტრაციული წარმოების ეტაპზე, სააგენტოს მოთხოვნის საფუძველზე სს „არ ემ ჯი კოპერ“-ის მიერ, 2025 წლის 18 დეკემბრის №193.224 წერილით წარმოდგენილი იქნა განახლებული გეგმა და მასთან დაკავშირებით დაზუსტებული ინფორმაცია, რომელსაც კანონის მე-9 მუხლის მე-3 პუნქტის შესაბამისად, თან ერთვის აუდიტორის/აუდიტორული ფირმის მიერ, დადასტურებული გეგმის ხარჯთაღრიცხვა.

ყოველივე ზემოაღნიშნულიდან გამომდინარე, „გარემოსდაცვითი პასუხისმგებლობის შესახებ“ საქართველოს კანონის მე-11 მუხლის საფუძველზე,

გ ბ რ ძ ა ნ ე ბ ო :

1. შეთანხმებულად ჩაითვალოს სს „არ ემ ჯი კოპერის“ (ს/კ 225358341) მიერ 2025 წლის 18 დეკემბრის №193.224 წერილით წარმოდგენილი, ბოლნისის მუნიციპალიტეტში გარემოსთვის მიყენებული მნიშვნელოვანი ზიანის (მდ. მაშავერას და მდ. კაზრეთულას დაბინძურება) გამოსასწორებელი ღონისძიებების თანდართულის გეგმა.
2. სს „არ ემ ჯი კოპერმა“ უზრუნველყოს №DES72300000066 ბრძანებით გათვალისწინებული დაზიანებული გარემოს - მდ. კაზრეთულას პირვანდელ (ზიანის მიყენებამდე არსებულ) მდგომარეობასთან მიახლოებულ მდგომარეობამდე აღდგენა და მდ. მაშავერას პირვანდელ (ზიანის მიყენებამდე არსებულ) მდგომარეობაში აღდგენა, შეთანხმებული გამოსასწორებელი ღონისძიებების გეგმის განსაზღვრული ღონისძიებების განხორციელებით, ამავე გეგმის გეგმა-გრაფიკით განსაზღვრულ ვადებში.
3. სს „არ ემ ჯი კოპერი“ ვალდებულია, „გარემოსდაცვითი პასუხისმგებლობის შესახებ“ საქართველოს კანონის მე-5 მუხლის, 1-ლი პუნქტის „ვ“ ქვეპუნქტის საფუძველზე, მნიშვნელოვანი ზიანის გამოსასწორებელი ღონისძიებების შეთანხმებიდან 30 კალენდარული დღის ვადაში საქართველოს სახელმწიფო ბიუჯეტში, სახელმწიფო ხაზინის ერთიან ანგარიშზე მიმართოს მნიშვნელოვანი ზიანის გამოსასწორებელი ღონისძიებების გეგმის ხარჯთაღრიცხვით განსაზღვრული ღონისძიებების საერთო ღირებულების თანხის 2%.

4. საქართველოს კანონის „გარემოსდაცვითი პასუხისმგებლობის შესახებ“ მე-11 მუხლის, მე-5 პუნქტის შესაბამისად, პასუხისმგებელი პირი ვალდებულია უზრუნველყოს მნიშვნელოვანი ზიანის გამოსასწორებელი ღონისძიებების გეგმის განხილვისთვის, სააგენტოს მიერ გაწეული ხარჯების (მათ შორის, ექსპერტიზის, კვლევითი სამუშაოების ღირებულების, საზოგადოებრივი ექსპერტის შრომის ანაზღაურებისა და სამივლინებო ხარჯების) სრულად ანაზღაურება, რამაც „ბოლნისის მუნიციპალიტეტში, დაბა კაზრეთში, სს „არ ემ ჯი კოპერის“ მიერ გარემოსთვის მიყენებული მნიშვნელოვანი ზიანის (მდ. მაშავერას და მდ. კაზრეთულას დაბინძურება) გამოსასწორებელი ღონისძიებების გეგმის“ განხილვისას შეადგინა - 3 214 ლარი. სს „არ ემ ჯი კოპერის“ მიერ ამ პუნქტით გათვალისწინებული თანხის ანაზღაურება მოხდეს მნიშვნელოვანი ზიანის გამოსასწორებელი ღონისძიებების გეგმის შეთანხმებიდან 30 კალენდარული დღის ვადაში საქართველოს სახელმწიფო ბიუჯეტში, ხაზინის ერთიან ანგარიშზე.
5. სს „არ ემ ჯი კოპერმა“ უზრუნველყოს „გარემოსდაცვითი პასუხისმგებლობის შესახებ“ საქართველოს კანონით დადგენილი მოთხოვნების დაცვა.
6. ბრძანება დაუყოვნებლივ გაეგზავნოს სს „არ ემ ჯი კოპერის“ (ს/კ 225358341).
7. ბრძანება ძალაში შევიდეს სს „არ ემ ჯი კოპერის“ მიერ მისი გაცნობისთანავე.
8. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. №6), მხარის მიერ მისი ოფიციალური წესით გაცნობის დღიდან ერთი თვის ვადაში.

ელენე ლუბიანური

სააგენტოს უფროსი

სსიპ გარემოს ეროვნული სააგენტო

<https://edocument.ge/mea/public/#/831-21-4-202512311401>

